



GADEIRLAN
LLANDAF
CATHEDRAL

CY MUN BENDIGAID

yn ôl Llyfr Gweddi Gyffredin 1984

Dydd Sul | 8.00am

Trefn y Gwasanaeth

I'w gadw yn y Gadeirlan.

THE HOLY EUCHARIST

according to the 1984 Book of Common Prayer

Sundays | 8.00am

Order of Service

Please do not remove this booklet from the cathedral

CROESO

Mae'n bleser gennym eich croesawu i'r gwasanaeth hwn yn eich Cadeirlan. Mae Eglwys Gadeiriol Saint Pedr & Paul, Teilo, Dyfrig, ac Euddogwy, wedi bod yn fan addoli Cristnogol ers dros 1,500 o flynyddoedd. Os ydych yn ymuno â ni am y tro cyntaf, cyflwynwch eich hun i aelod o'r offeiriadaeth, a byddant yn hapus i ddweud mwy wrthyhch am addoli yn y lle hwn.

Ers y cyfnod Cristnogol cynharaf mae'r gair Ewcharist, sy'n dod o'r gair Groeg am 'ddiolchgarwch', wedi cael ei ddefnyddio i ddisgrifio'r sacrament a sefydlodd Iesu Grist yn y swper olaf. Mewn ffyddlondeb i gyfarwyddyd ein Harglwydd i 'wneud hyn er cof amdanaf' roedd yr Ewcharist felly yn cael ei ystyried yn rhan hanfodol o addoliad yn yr eglwys fore a heddiw mae'n parhau i fod yn weithgaredd litwrgaidd canolog i'r rhai bedyddiedig.

Mae testun y salm a'r darlleniadau ar gyfer y gwasanaeth hwn i'w gweld yn yr hysbysiad wythnosol. Mae popeth arall i'w weld yn y llyfryn hwn. Ymunwch â'r geiriau sydd wedi'u hargraffu mewn **print bras**. Awgrymiadau yn unig yw'r cyfarwyddiadau yn y gwasanaeth hwn (wedi'i marcio â §) sy'n nodi pryd i sefyll ac eistedd. Os ydych chi'n fwy cyfforddus yn eistedd drwy gydol y gwasanaeth, gwnewch hynny.

Mae **wafferi di-glwten** ar gael yn y Cymun. Os dymunwch dderbyn un, gofynnwch i stiward ymlaen llaw.



Mae system dolen glyw ar gael yn y Gadeirlan i ddefnyddwyr teclynnau cymorth clyw. Dylai defnyddwyr droi eu teclynnau cymorth clyw i'r gosodiad **T**.

Ceir **fersiwn print bras** o'r llyfryn hwn.
Gofynnwch i stiward am gopi.

Lleolir toiledau ar ddiwedd y Llwybr Gorymdeithiol trwy Gapel Dewi, ar ochr ogleddol y Gadeirlan.



Gofynnir i chi sicrhau bod eich ffôn symudol neu unrhyw declyn cyfathrebu cludadwy arall wedi'i osod ar ddistaw. Gofynnir yn garedig i chi beidio a chymeryd ffotograff na recordiad sain neu fideo yn y gadeirlan ar unrhyw adeg yn ystod y gwasanaeth.

TREFN Y GWASANAETH

§ *Sefyll wrth i'r orymdaith ddod i mewn.*

✠ Yn Enw'r Tad, a'r Mab, a'r Ysbryd Glân.
Pawb **Amen.**

**Hollalluog Dduw, i ti y mae pob calon yn agored,
pob dymuniad yn hysbys, a phob dirgel yn amlwg;
glanha feddyliau ein calonnau
trwy ysbrydoliaeth dy Lân Ysbryd,
fel y carom di yn berffaith,
a mawrhau'n deilwng dy Enw sanctaidd;
trwy Grist ein Harglwydd. Amen.**

Pawb Arglwydd, trugarha wrthym.
Crist, trugarha wrthym.
Arglwydd, trugarha wrthym.

§ *Yn ystod y Grawys, gellir defnyddio'r Deg Gorchymyn.*

§ *Ar ôl pob un o'r Naw Gorchymyn cyntaf, defnyddir yr ymateb hwn:*

All **Arglwydd, trugarha wrthym,
a gostwng ein calonnau i gadw'r gyfraith hon.**

Duw a ddywedodd:

1. Myfi yw'r Arglwydd dy Dduw; na fydded iti dduwiau eraill ond myfi.
2. Na wna i ti dy hun ddelw gerfi edig, na llun dim sydd yn y nefoedd uchod, nac ar y ddaear isod, nac yn y dŵr o dan y ddaear; na ostwng iddynt, ac na addola hwynt.
3. Na chymer enw'r Arglwydd dy Dduw yn ofer.
4. Cofi a gadw'n sanctaidd y dydd Sabath.
5. Anrhydedda dy dad a'th fam.
6. Na ladd.
7. Na wna odineb.
8. Na ladrata.
9. Na ddwg gam dystiolaeth yn erbyn dy gymydog.
10. Na chwennych ddim sy'n eiddo dy gymydog.

§ *Ar ôl y Degfed Gorchymyn, dywedir y canlynol:*

Pawb **Arglwydd, trugarha wrthym,
ac ysgrifenna'r holl ddeddfau hyn yn ein calonnau,
atolygwn iti.**

§ *Penlinio neu Eistedd.*

Cyffeswn yn ostyngedig ein pechodau gerbron yr Hollalluog Dduw.

Pawb **Hollalluog Dduw, ein Tad nefol,
yr ydym wedi pechu yn dy erbyn ar feddwl,
gair a gweithred, ac yn yr hyn na wnaethom.
Yr ydym yn ddifrifol yn edifarhau
ac mae'n ddrwg gennym am ein holl bechodau.
Trugarha wrthym, drugarocaf Dad;
maddau inni'r hyn oll a aeth heibio;
a chaniatâ inni allu byth o hyn allan
dy wasanaethu a'th fodloni mewn newydd deb buchedd,
er anrhydedd a gogoniant dy Enw;
trwy Iesu Grist ein Harglwydd. Amen.**

Offeiriad Yr Hollalluog Dduw a drugarbao wrthyh:
maddau i chwi, a'ch gwared oddi wrth eich holl bechodau;
eich cadarnhau a'ch nerthu ym mhob daioni;
a'ch dwyn i fywyd tragwyddol;
trwy Iesu Grist ein Harglwydd.

Pawb **Amen.**

§ *Sefyll.*

Pawb **Gogoniant yn y goruchaf i Dduw,
ac ar y ddaear tangnefedd, ewyllys da i ddynion.
Moliannwn di, bendithiwn di, addolwn di, gogoneddwn di,
diolchwn iti am dy fawr ogoniant,
Arglwydd Dduw, Frenin nefol, Dduw Dad Hollalluog.**

**O Arglwydd, yr unig genedledig Fab, Iesu Grist;
O Arglwydd Dduw, Oen Duw, Fab y Tad,
Sy'n dwyn ymaith bechodau'r byd, trugarha wrthym.
Tydi sy'n dwyn ymaith bechodau'r byd, derbyn ein gweddi.
Tydi sy'n eistedd ar ddeheulaw Duw Dad, trugarha wrthym.
Oblegid ti yn unig sy'n Sanctaidd; ti yn unig yw'r Arglwydd;
ti yn unig, O Grist, gyda'r Ysbryd Glân,
sydd Oruchaf yng ngogoniant Duw Dad. Amen.**

GWEINIDOGAETH Y GAIR

Colect

Pawb **Yr Arglwydd y fo gyda chwi
a hefyd gyda thi.**

§ *Colect neu Golectau'r dydd.*

Pawb **Amen.**

Gweler y daflen wythnosol ar gyfer y darlleniadau a'r salm.

Llith or Hen Destament

Darllenydd Y darlleniad o...

§ *Ar ddiwedd y darlleniad:*

Pawb Dyma air yr Arglwydd.
Diolch a fo i Dduw.

Y Salm

Yr Epistol

Darllenydd Y darlleniad o...

§ *Ar ddiwedd y darlleniad:*

Pawb Dyma air yr Arglwydd.
Diolch a fo i Dduw.

§ Sefyll.

Yr Efengyl

Pawb Gwrandewch yr Efengyl Sanctaidd yn ôl Sant ...
Gogoniant i ti, O Arglwydd

§ Ar ôl yr Efengyl:

Pawb **Moliant i ti, O Grist.**

Credo Nicea

Pawb Credaf yn un Duw,
y Tad Hollalluog,
gwneuthurwr nef a daear,
a phob peth gweledig ac anweledig.

Ac yn un Arglwydd Iesu Grist,
unig-genedledig Fab Duw,
cenedledig gan y Tad cyn yr holl oesoedd,
Duw o Dduw, Llewyrch o Lewyrch,
Gwir Dduw o Wir Dduw,
wedi ei genhedlu, nid wedi ei wneuthur,
yn un hanfod â'r Tad,
a thrwyddo ef y gwnaed pob peth:
yr hwn er ein mwyn ni ddynion, ac er ein hiachawdwriaeth
a ddisgynnodd o'r nefoedd,
ac a gnawdiwyd trwy'r Ysbryd Glân o Fair Forwyn,
ac a wnaethpwyd yn ddyn,
ac a groeshoeliwyd hefyd drosom dan Pontius Pilat.
Dioddefodd ac fe'i claddwyd,
ac atgyfododd y trydydd dydd yn ôl yr Ysgrythurau,
ac esgynnodd i'r nef,
ac y mae'n eistedd ar ddeheulaw'r Tad.
A daw drachefn mewn
gogoniant i farnu'r byw a'r meirw:
ac ar ei deyrnas ni bydd diwedd.

A chredaf yn yr Ysbryd Glân,
yr Arglwydd, y Bywiawdwr,
sy'n deillio o'r Tad a'r Mab,
yr hwn gyda'r Tad a'r Mab a gyd-addolir
ac a gydgoneddir,
ac a lefarodd trwy'r proffwydi.

A chredaf yn Un Eglwys Lân Gatholig ac Apostolig.
Addefaf un Bedydd er maddeuant pechodau.
A disgwyliaf am Atgyfodiad y meirw,
a bywyd y byd sydd i ddyfod. Amen.

§ Penlinio neu Eistedd.

Gweddiwn dros holl Eglwys Crist a thros bawb yn ôl eu hangen.

Hollalluog a byth-fywiol Dduw, deisyfwn yn ostyngedig arnat ysbrydoli'n barhaus yr Eglwys gyffredinol ag ysbryd y gwirionedd, undod, a chytgord, fel y gall pawb sy'n cyffesu dy Enw sanctaidd gytuno yng ngwirionedd dy Air sanctaidd, a byw mewn undod a chariad duwiol. Arglwydd, yn dy drugaredd,

Pawb **Gwrando ein gweddi.**

Dyro ras, O Dad nefol, i'r holl Esgobion, Offeiriaid a Diaconiaid, ac yn enwedig i'th was **E** ein Heskob, fel y gallant trwy eu buchedd a'u hathrawiaeth gyhoeddi dy wir a'th fywiol air, a gweinyddu dy Sacramentau Sanctaidd yn iawn ac yn ddyladwy.

Pawb Arglwydd, yn dy drugaredd,
Gwrando ein gweddi.

Dyro i'th holl bobl dy nefol ras, ac yn enwedig i'r gynulleidfa sydd wedi ymgynnull yma; er mwyn iddynt dy wasanaethu'n gywir mewn sancteiddrwydd a chyfiawnder holl ddyddiau eu bywyd.

Pawb Arglwydd, yn dy drugaredd,
Gwrando ein gweddi.

Erfyniwn arnat, O Arglwydd, gyfarwyddo â'th ddoethineb nefol y rhai hynny sy'n llywodraethu cenedloedd y byd, fel y llywodraethir dy bobl yn ffyddlon ac yn uniawn; bendithia dy wasanaethydd *Charles ein Brenin*, a phob un sy'n dwyn awdurdod dano.

Pawb Arglwydd, yn dy drugaredd,
Gwrando ein gweddi.

O'th ddaioni, Arglwydd, cynorthwya a chysura bawb sydd mewn trallod, tristwch, angen, afiechyd, neu ryw adfyd arall, gan roddi iddynt ymwared dedwydd o'u holl gystuddiau.

Pawb Arglwydd, yn dy drugaredd,
Gwrando ein gweddi.

Cyflwynwn i'th ofal grasol, O Arglwydd, dy holl weision a ymadawodd â'r fuchedd hon yn dy ffydd di a'th ofn, gan erfyn arnat ganiatáu i ni gyda hwy fythol oleuni a thangnefedd. Arglwydd, yn dy drugaredd,

Pawb **Gwrando ein gweddi.**

Yn olaf, bendithiwn dy Enw sanctaidd am y gras a'r rhinweddau a arnlygwyd yn dy holl Saint. Caniatâ i ni, gan yrnlawenhau yn eu cymdeithas a chan ddilyn eu hesiamplau da, gael ein gosod gyda hwynt ar ddeheulaw dy Fab ar ei ymddangosiad ef a bod yn gyfrannog o'th deyrnas nefol.

Pawb **Gwrando ni, O Dad nefol, er mwyn Iesu Grist, ein hunig Gyfryngwr ac Eiriolwr, y bo iddo gyda thi a'r Ysbryd Glân bob anrhydedd a gogoniant, byth heb ddiwedd. Amen.**

GWEINIDOGAETH Y SACRAMENT

§ *Sefyll.*

Tangnefedd yr Arglwydd a fo bob amser gyda chwi;
A chyda'th ysbryd dithau.

Pawb

Yr Offrymiad

Oddi wrthyt ti y daw pob peth;
Ac o'th law dy hun y rhoddwn i ti.

Pawb

Y Weddi Ewcaristiaidd

Yr Arglwydd a fo gyda chwi;
A chyda'th ysbryd dithau.

Pawb

Dyrchefwch eich calonau;
Yr ydym yn eu dyrchafu at yr Arglwydd.

Pawb

Diolchwn i'n Harglwydd Dduw;
Addas a chyfiawn yw gwneuthur hynny.

Pawb

Cwbl addas a chyfiawn a'n rhwymedig ddyled, yw bob amser ac ym mhob lle ddiolch i ti, Arglwydd, Sanctaidd Dad, Hollalluog, Dragwyddol Dduw.

§ *Gellir defnyddio hwn neu'r rhagymadrodd cywir:*

Trwy Iesu Grist ein Harglwydd, sydd trwy ei angau ei hun wedi dinistrio angau, a thrwy ei atgyfodiad i fywyd wedi adfer inni fywyd tragwyddol.

Gan hynny gydag Angylion ac Archangylion, a chyda holl gwmpeini nef, y moliannwn ac y mawrhawn dy Enw gogoneddus, gan dy foliannu'n wastad a dywedyd:

Pawb

**Sanct, Sanct, Sanct,
Arglwydd Dduw'r Lluoedd,
nef a daear sy'n llawn o'th ogoniant.
Gogoniant a fo i ti, O Arglwydd goruchaf.**

**Bendigedig yw'r hwn sy'n dyfod yn Enw'r Arglwydd.
Hosanna yn y goruchafion.**

§ *Penlinio neu Eistedd.*

Y gogoniant, y mawl a'r diolch a fo i ti, Hollalluog Dduw, ein Tad nefol, creawdwr a chynhaliwr pob peth a gwneuthurwr dyn ar dy ddelw dy hun. Rhoddaist dy unig Fab Iesu Grist i gymryd ein natur ni ac i ddioddef angau ar y Groes er ein prynedigaeth. Gwnaeth yno yr unig aberth perffaith a chyflawn dros bechodau'r holl fyd; ordeiniodd hefyd, a gorchymyn yn ei Efengyl Sanctaidd gadw ohonom, goffa gwastadol am ei angau gwerthfawr hwnnw, nes ei ddyfod drachefn.

Gan hynny, O Dad trugarog, erfyniwn arnat sancteiddio â'th Ysbryd Glân dy roddion hyn o Fara a Gwin, fel y gallwn ni, o'u derbyn yn ôl ordinhad sanctaidd dy Fab a'n Gwaredwr Iesu Grist, fod yn gyfrannog o'i werthfawrocaf Gorff a'i Waed:

Yr hwn y nos y bradychwyd ef, a gymerodd Fara ac wedi iddo ddiolch, fe'i torrodd a'i roddi i'w ddisgyblion, gan ddywedyd:

*Gyrnerwch, bwytechwch; hwn yw fy Nghorff a roddir drosoch:
Gwnewch hyn er cof amdanaf.*

Yr un modd wedi swper fe gymerodd y Cwpan ac wedi iddo ddiolch, fe'i rhoddodd iddynt, gan ddywedyd:

*Yfwch o hwn bawb,
oblegid hwn yw fy Ngwaed o'r Cyfamod Newydd
a dywelltir drosoch a thros lawer er maddeuant pechodau :
Gwnewch hyn, gynifer gwaith yr yfwch ef, er cof amdanaf.*

Am hynny, O Arglwydd a nefol Dad, gan goffâu dioddefaint bendigedig, atgyfodiad nerthol, a dyrchafael gogoneddus dy anwylaf Fab, megis y gorchymynnodd ef i ni, a chan lawenhau yn rhodd yr Ysbryd Glân drwyddo ef, a hefyd gan ddisgwyl ei ddyfodiad drachefn mewn gallu a gogoniant mawr, yr ydym ni dy weision, gyda'th holl bobl sanctaidd, yn gosod gerbron dy Ddwyfol Fawredd y Bara hwn, bara'r bywyd tragwyddol, a'r Cwpan hwn, cwpan iachawdwriaeth dragwyddol.

Ac erfyniwn arnat dderbyn ein haberth hwn o foliant a diolch a rhoddi i ni ac i'th holl Eglwys faddeuant o'n pechodau a phob doniau eraill o'i ddioddefaint ef. A gweddiwn am i bawb ohonom sy'n gyfrannog o'r Cymun bendigaid hwn gael ein diwallu a'th ras a'th fendith nefol, a'n cyfrif yng nghwmni gogoneddus dy saint.

Trwy Iesu Grist ein Harglwydd, y bo trwyddo ef, ynddo ef, a chydag ef, yn undod yr Ysbryd Glân, bob anrhydedd a gogoniant i ti, O Dad Hollalluog, dros yr holl oesoedd byth heb ddiwedd.

Amen.

Pawb

§ *Mae'r Offeiriad yn torri'r Bara, gan ddweud:*

Y Bara yr ydym yn ei dorri;
Onid cymun Corff Crist ydyw?

Pawb

Yr ydym ni sy'n llawer yn un Bara, un Corff;
Oblegid yr ydym oll yn gyfrannog o'r un Bara.

Pawb

§ *Yna gellir dweud:*

**Nid ydym yn rhyfygu dyfod at dy fwrdd di yma,
Arglwydd trugarog,
gan ymddiried yn ein cyfiawnder ein hunain,
eithr yn dy aml a'th ddirfawr drugareddau di.
Nid ydym ni'n deilwng gymaint ag i gasglu'r briwsion
dan dy fwrdd di,
Eithr yr un Arglwydd wyt ti,
a pherthyn i ti drugarhau'n wastad.
Caniatâ i ni, gan hynny, Arglwydd grasol,
felly fwyta cnaud dy annwyl Fab Iesu Grist,
ac yfed ei waed ef,
fel y trigom byth ynddo ef, ac yntau ynom ninnau. Amen.**

Pawb

§ *Yna gellir dweud:*

**Oen Duw,
sy'n dwyn ymaith bechodau'r byd,
trugarha wrthym.**

Pawb

**Oen Duw,
sy'n dwyn ymaith bechodau'r byd,
trugarha wrthym.**

**Oen Duw,
sy'n dwyn ymaith bechodau'r byd,
dyro inni dy dangnefedd.**

Megis y dysgodd ein Hiachawdwr Iesu Grist ni, yr ydym yn eofn yn dywedyd:

Pawb **Ein Tad, yr hwn wyt yn y nefoedd,
sancteiddier dy enw;
deled dy deyrnas; gwnele dy ewyllys;
megis yn y nef, felly ar y ddaear hefyd.
Dyro i ni heddiw ein bara beunyddiol.
A maddau i ni ein dyledion,
fel y maddeuwn ninnau i'n dyledwyr.
Ac nac arwain ni i brofedigaeth;
eithr gwared ni rhag drwg.
Canys eiddot ti yw'r deyrnas,
a'r gallu, a'r gogoniant,
yn oes oesoedd. Amen.**

Dewch yn nes a derbyniwch Gorff a Gwaed ein Harglwydd Iesu Grist a roddwyd drosoch, ac ymborthwch arno yn eich calonnau trwy ffydd gan roddi diolch.

§ *Derbyn yr Offeiriad y Cymun Bendigaid, a gweinyddir y Sacrament â'r geiriau hyn:*

Corff Crist a'th gadwo yn y bywyd tragwyddol. **Amen.**
Gwaed Crist a'th gadwo yn y bywyd tragwyddol. **Amen.**

§ *Sefwch ar eich traed, os gwelwch yn dda, wedi'r dosbarthu.*

Pawb Diolchwch i'r Arglwydd, oblegid graslon yw ef;
Oherwydd ei drugaredd sy'n dragywydd.

Pawb **Hollalluog Dduw, diolchwn i ti am ein porthi â Chorff a Gwaed dy Fab Iesu Grist, trwy'r hwn yr offrymwn ein heneidiau a'n cyrff yn aberth bywiol i ti. Anfon ni allan yn nerth dy Ysbryd i, fyw ac i weithio er mawl a gogoniant i'th New. Amen.**

Pawb Yr Arglwydd a fo gyda chwi:
A chyda'th ysbryd dithau.

[Tangnefedd Duw, sydd uwchlaw pob deall, a gadwo eich calonnau a'ch meddyliau yng ngwybodaeth a chariad Duw, a'i Fab Iesu Grist ein Harglwydd];

✠ a Bendith Duw Hollalluog, y Tad, y Mab, a'r Ysbryd Glân, a fo yn eich plith ac a drigo gyda chwi yn wastad.
Pawb **Amen.**

Pawb Awn ymaith mewn tangnefedd;
Yn Enw Crist. Amen.

§ *Parhewch i sefyll tra bo'r Orymdaith yn gadael yr Eglwys Gadeiriol.*

Tymor Adfent

Am iti roddi iachawdwriaeth i ddynolryw trwy ddyfodiad dy Fab ein Gwaredwr Iesu Grist, trwy'r hwn y gwneir pob peth yn newydd gennynt pan ddaw drachefn mewn gogoniant i farnu'r byd.

Dydd Nadolig Crist a hyd Noswyl yr Ystwyll

Am i ti roddi Iesu Grist dy un Mab i'w eni ar gyfenw i'r amser yma drosom ni, yr hwn, trwy weithrediad yr Ysbryd Glân, a wnaed yn wir ddyn o sylwedd y Forwyn Fair ei fam, ac yntau heb ddim pechod, i'n glanhau ni oddi wrth bob pechod.

Yr Ystwyll, a'r saith diwrnod canlynol; a hefyd ar Wyl y Gweddnewidiad

Trwy Iesu Grist ein Harglwydd, a amlygodd ei ogoniant yn sylwedd ein cnawd marwol ni, fel y dygai ni allan o dywyllwch i'w oleuni gogoneddus ef.

Dydd Mercher y Llundw ac ar ddyddiau gwaith hyd dymor y Dioddefaint

Trwy Iesu Grist ein Harglwydd a demtiwyd ym mhob modd fel ninnau, ond eto na phechodd, a thrwy ei ras ef y mae inni'r gallu i orchfygu ein temtasiynau.

Tymor y Dioddefaint

Trwy Iesu Grist ein Harglwydd, a gaed mewn dull fel dyn, ac a'i dibrisiodd ei hun, gan fod yn ufudd hyd angau, ie, angau'r Groes, fel, wedi ei ddyrchafu oddi ar y ddaear, y tynnai bawb ato ei hun.

Dydd y Pasg a hyd Noswyl y Dyrchafael yn gynhwysol

Ond yn bennaf yr ydym yn rhwymedig i'th foliannu am Atgyfodiad gogoneddus dy Fab Iesu Grist ein Harglwydd: oblegid ef yw'r gwir Oen Pasg a offrymwyd drosom, ac sydd wedi dwyn ymaith bechod y byd; yr hwn trwy ei angau ei hun a ddinistriodd angau, a thrwy ei atgyfodiad i fywyd a adferodd inni fywyd tragwyddol.

Dydd Y Dyrchafael a hyd Noswyl y Pentecost yn gynhwysol

Trwy dy anwylaf Fab Iesu Grist ein Harglwydd, a ymddangosodd yn eglur i'w holl Apostolion, wedi ei Atgyfodiad gogoneddus, ac yn eu golwg a esgynnodd i'r nef, i baratoi lle i ni; fel, lle y mae ef, yno yr esgynnwn ninnau hefyd, a theyrnasu gydag ef mewn gogoniant.

Dydd y Pentecost a'r chwe diwrnod canlynol

Trwy Iesu Grist ein Harglwydd, y daeth yr Ysbryd Glân, ar gyfenw i'r amser yma, yn ôl ei gywiraf addewid, o'r nef â sŵn mawr disymwth, fel gwynt nerthol, ar wedd tafodau o dân, yn disgyn ar yr Apostolion, i'w dysgu hwynt, ac i'w harwain i bob gwirionedd; gan roddi iddynt ddawn amryw ieithoedd, a hefyd hyder a sêl angerddol i bregethu'r Efengyl yn ddyfal i'r holl genhedloedd; ac oblegid hyn dygwyd ni allan o dywyllwch a chyfeiliorni i'th oleuni eglur ac i wir adnabyddiaeth ohonot ti a'th Fab Iesu Grist.

Naill ai

neu

Trwy Iesu Grist ein Harglwydd, yr hwn, wedi iddo esgyn i'r uchelder, ac eistedd ar ddeheulaw dy Fawredd, a dywalltodd ar yr Eglwys dyYsbryd Glân: fel, trwy rym ei ogoniant, y gallai'r holl fyd offrymu i ti aberth moliant

Sul y Drindod yn unig

Sydd gyda'th unig-genedledig Fab a'r Ysbryd Glân yn un Duw, un Arglwydd, mewn Trindod o Bersonau ac mewn Undod Sylwedd; oblegid yr hyn yr ydym yn ei gredu am dy ogoniant, O Dad, hynny yr ydym yn ei gredu am y Mab, ac am yr Ysbryd Glân, heb unrhyw wahaniaeth nac anghydraddoldeb.

Gwyliau Cyflwyniad Crist yn y Deml a'r Cyfarchiad, a Gwyliau Mair Forwyn Fendigaid

Am iti roddi Iesu Grist, dy unig Fab, i'w eni er ein hiachawdwriaeth; yr hwn, trwy weithrediad yr Ysbryd Glân, a wnaed yn wir ddyn o sylwedd y Forwyn Fair ei fam, ac yntau heb ddim pechod, i'n glanhau ni oddi wrth bob pechod.

Gwyliau Saint a chanddynt Wasanaeth a Rhagymadrodd Priod fel a benodir yn y Calendr *ac eithrio Gwyliau Cyflwyniad Crist yn y Deml a'r Cyfarchiad, Gwyliau Mair Forwyn Fendigaid, Gŵyl Fihangel a Gwyliau yn Wytheidiau'r Nadolig a'r Dyrchafael*

Am i ti amlygu gras Iesu Grist yn dy holl Seintiau a eglurodd dy ogoniant yn eu bywyd, ac sydd mewn cymdeithas â ni yn offrymu diolch a moliant i ti.

§

Wrth goffáu'r ymadawedig gellir defnyddio Rhagymadrodd Priod y Sul.

Cydnabyddiaethau

Y mae'r gwasanaeth hwn yn cynnwys rhannau o'r Llyfr Gweddi Gyffredin i'w arfer yn yr Eglwys yng Nghymru, hawlfraint © Gwasg yr Eglwys yng Nghymru 1984.

Cysodwyd mewn Gill Sans Nova

Penawdau wedi'u teipio yn Cormorant Garamond

Hawlfraint © Cadeirlan Llandaf

Acknowledgements

The Book of Common Prayer for use in the Church in Wales, material from which is included in this service is copyright © The Church in Wales publications 1984.

Typeset in Gill Sans Nova

Headings typeset in Cormorant Garamond

Copyright © Llandaff Cathedral



CADEIRLAN
LLANDAF
CATHEDRAL